

紀文達公遺集

紀文達公遺集卷第九

孫樹馨編校

三十六亭詩

自題秋山獨眺圖

木落萬山秋荒徑交榛梗獨立千仞岡蒼蒼空翠影山
路豈不艱風露亦云冷平生多苦心愛此無人境遠想
一慨然中懷徒耿耿

又題

秋山高不極盤磴入煙霧仄徑莓苔滑猿猱不敢步杖
策陟巉巖披榛尋微路直上萬峰巔振衣獨四顧秋風

天半來奮迅號林樹俯見豺狼蹲側聞虎豹怒立久心
茫茫悄然生恐懼置身豈不高時有蹉跌慮徙倚將何
依悽切悲霜露微言如可聞冀與孫登遇

卽目二首

村落圍流水人家半夕陽殘霞明滅處隱隱下牛羊
芳草入平林一綫盤盤路遙聞牧笛聲縹緲無尋處

至東光口占

胡蘇亭下悵夷猶十二年前感舊游四姓門庭猶曩昔
五陵士女更風流寒鴉亂噪荒城曉孤鶴長鳴碧落秋
黃葉蕭蕭騎馬路橫鞭徑上酒家樓

雁

搖落西風木葉黃
嗷嗷鴻雁憶衡陽
身微未敢衝霜雪
飛急何關趁稻粱
回首雲天猶悵望
無端蹤跡似炎涼
瀟湘岸上逢歸燕
亦別盧家玳瑁梁

和蒙泉秋感

一灣銀浦淡雲流
長笛蕭條趙倚樓
往日情懷全似夢
頻年飄泊始知愁
風寒大澤魚龍夜
霜捲長天雕鶚秋
惆悵舊來紅葉渡
不堪重棹木蘭舟

送葛聞橋員外歸江寧

儀部葛聞橋先生移疾南歸其門人蒙泉太史

徵詩贈行子與先生未相識然吾黨讀書論古
於風流孤絕之士未嘗不慨然想見其爲人況
高情逸韻近在同時者也爰賦短章良深向往
朝衫仍換舊漁簑鴻雁西風下潞河水國蒹葭人自往
寒江鷗鷺意如何一帆秋色歸舟穩千里孤雲遠夢多
惆悵相知未相識離歌三疊託微波

黃烈女詩

烈女楚人許字同縣李子未嫁而李先逝女誓
死歸守三載矣一夕夢李子來迎次日往與母
訣未及返而卒女家執古禮葬黃氏塋旁其舅

往哭之女墓忽自裂兩家歎異乃與李合葬焉
李子之弟然山太史爲之傳余附以詩

總帷一息寄餘生三載親調廚下羹此念從來堪自信
妾身誰道未分明延陵有劍心相許屬國吞氊志竟成
特與人間存大節不關兒女有深情

西風驚破夢依稀鬱鬱埋香事竟違地下應無鵲夜渡
墳前忍使鳳孤飛延津寶劍終雙去合浦明珠解自歸
誰與重翻新樂府古來曾唱華山畿

張烈女詩

烈女天津人未嫁夫死自溺以殉蓋乾隆十二

年事追賦此詩

去年三月二十日我自津門泛舟出海雲東北生烏鳶
鳴噪急舟人收柁驚相呼惡風白浪來天末覆鼉盤擲
四塞昏魚龍撥刺長河溢羲和日車不敢行六螭飄忽
愁相失三百六十軸大地疑汨沒杳杳冥冥中鬼神泣
嗚咽未測造物心何事驚倉卒誰知烈女命正以斯時
畢吁嗟乎不爲木蘭卽爲曹娥烈女嘗以二人自比憂來傷人淚
滂沱妾身雖未嫁一言旣許安有他但愁黃泉下未曾
相識其如何我感其事爲悲且歌今夕何夕愴懷實多
簾幃舒卷戛戛聲磨孤燈忽暗毛髮立精靈彷彿雲中

過悄然神悚不敢坐空庭颯颯生風波夜半開門望天
地盲風暗雨如翻河

雜詩三首

少年事游俠腰佩雙吳鉤平生受人恩一一何曾酬瓊
玖報木李茲事已千秋撫已良多慙紛紛焉足尤
蝮蛇一螫手斷腕乃不疑一體本自愛勢迫當如斯世
途多險阻棄置復何辭惻惻谷風詩無忘安樂時
北風淒以厲十月空林寒飄搖霜雪降蕙草亦已殘黃
鵠接翼翔豈礙天地寬前後相和鳴亦足爲君歡

送惠仲晦太史歸西安三首

水曲山重黯落暉河梁日暮送將歸樓頭鼓角催殘雪
十月寒深雁不飛

離懷愁思晚騷騷千里寒雲一望高風雪滿天搖落盡
更無木葉下亭臯

一道風煙西入秦故山猿鶴定相親明年渭北春天樹
樽酒時時憶故人

歲暮懷人各成一詠

我友滿長安仲良特高妙發論激天風空山鸞鳳嘯十
月潞河水別離悵同調此夕隔關山明月虛堂照

德州宋編

露園實妙才早歲標奇穎軒鶴入雞羣泊然見孤迥文

章老更成壯懷激已冷蹉跎誰復論相思冬夜永

景州李孝

廉基

東魯陋巷生詩思何清壯高躡鳳凰翎寄意青霞上夢

想識容輝頽然見天放耿耿降婁星中宵起相望

曲阜顧明

經懋

老狂邊季子壯志孤煙高得名三十載門戶猶蓬蒿長

嘯坐彈琴王侯不敢招想像敗絮中風雪空簞瓢

任邱邊徵

君連

申公古逸民沈湎誰能識望古多遠懷玩世無忤色鴻

飛自冥冥身名一爪跡才盡江文通未應傷鳳德

景州中廣

文

廉衣振高節神龍誰得控傲物本無心真氣自驚衆別

我日以疎昨宵猶入夢古道良足希一官非所重

任邱李庶

常中簡

吾愛國冠霞灑落富清製百鳥自啾唧孤鶴時一唳俱

爲長安客未能結意氣何當緘遠情寄之南雲際

江南圖副

車昇

吾舅慕隱淪中懷本澹蕩雖無蓋世名雅意存清尙生

計日以拙彌覺襟期曠大雅逝已頽相憶羲皇上

舅氏滄州

張公
拱乾

西征

良臣合共國分憂元輔提兵靖塞酋關外誰爲班定遠
軍中正待武鄉侯莫驚殺氣連笳竿肯使妖星照益州
聖主臨軒恩意重冬寒更賜紫貂裘

擬古二首

十三學擊劍十四能談兵十五買駿馬慷慨從軍行路
逢魯朱家車騎何縱橫邀我登高堂置酒吹竽笙感君
意氣重亦欲傾平生丈夫誓許國邊徼方長征

曾連天下士本自澹名人一朝感世故高義橫天雲力

排新垣衍長揖平原君事成竟高蹈翩然還隱淪我讀
短長書感激爲沾巾千金亦易辭所貴却秦軍

贈戈芥舟二首

長鯨跋浪出萬里滄溟開三山岌欲動倏忽生風雷
君振高節早歲馳雄才胡爲久蹉跎幽鬱使心哀綠草
春離離感激黃金臺

飢鷹思掣韉疲馬思疆場壯志雖不遂猛氣猶飛揚緬
懷古烈士撫已多慨慷不有辛苦人焉識勞者傷長歛
發哀彈惻惻沾衣裳

送梁幼循南歸

庭際下黃葉颯然秋氣生客心正蕭瑟良友復長征聞
說潞河水比來新漲平爲憑將別意流到古杭城

寄贈露園四首

四十年來兩鬢星蕭條生事太元經長楊羽獵無心賦
載酒何人問草亭

松火談詩夜唱酬當年小宋憶同游王維早貴襄陽老
俱是開元第一流

豐草長林老杜陵名場偶逐少年登騎驢日日長安市
才有新詩上左丞

獵獵驚風雪打圍蒨侯城畔射生歸短衣匹馬何人識

長嘯高原看落暉

與蒙泉閱長河志因出所作州乘餘聞見示題二

絕句

六朝小史艷縑緗蕭倚王嘉總擅場獨與臨川傳世說
可憐劉峻在齊梁

檢點平生記事珠丹鉛一字幾踟躕何人復作裴郎學
一笑黃公舊酒壚

哭田白岩四首

千里銘旌下潞河風流張緒悵靈和蕭蕭秋雨隨孤櫬

又爲田橫賦挽歌

白岩與海豐張舍人完質相次卒

蕭條空館夜啼烏藥裏何人伴病夫攜得椒漿和淚奠

可憐曙後一星孤

白岩無子
惟有一女

十載清貧寄一官焚香掃地坐蕭然無端身後留遺恨
剩得城南二頃田

度曲紅牙欲付誰殘膏賸馥舊烏絲秋風憶爾填新句

又是黃深綠淺時

向與白岩同送葛聞橋南歸有
一路黃深綠淺句余最愛之

竹下閒行有懷

竹徑秋風急琤然鸞鳳音枝高時動影葉薄不成陰我
有王猷興徘徊盡日吟因憐空谷裏翠袖暮寒深

偶見二首

清水魚不肥空倉雀苦飢鱗枯毛羽瘁悽切秋風時行
行偶一見惻惻爲傷悲微軀雖鄙賤亦荷皇天慈豈無
釣弋具念此不忍施撥食與田鳥日暮持筐歸老農多
惻隱感彼田家詩

鼠穴掘榛實鼠死高樹枝泰山與鴻毛微物焉能知但
思罹酷暴飢死理亦齊有生豈不愛此志良可悲虞衡
有厲禁惜哉空爾爲每聞獵師言涕下沾裳衣

讀蓮洋集四首

妙悟多從象罔求麤豪似爾亦風流碧雞久已分王霸
正合齊名趙倚樓

幕下曾經李玉溪驂騑老大竟相齊平生惆悵梁園雪
半是開封使院題

鳳髓何由續斷絃寒山詩句竟凋殘微雲疎雨堪千古
剛憶芙蓉不耐寒

緡盡龍宮貝葉篇層層雁塔記諸天金頭自解拈花笑
未是滄浪水月禪

京邸雜題六首

孤桐館

月出夜蒼蒼秋色澹無際梧桐葉蕭瑟影落庭前地覽
景欲有吟寂然無一意淅瀝微風聲心清亦不寐

槐安國

萬古一夢覺大千纔瞬息七情紛擾攘當境誰能識安
知此樹下不有槐安國安知此天地不在槐根側真妄
竟何有輾轉空疑惑且看向南枝皎然映月色移榻坐
軒楹忘機兩冥默

生雲精舍

名山蘊神秀氣化成雲雨小山無真氣假合石與土空
說欲生雲不見蓊然吐宋人刻楮葉貌似終無取但念
城市居鬱鬱生環堵且存巖壑意晨夕相容與

閱微草堂

讀書如遊山觸目皆可悅千岩與萬壑焉得窮曲折煙霞滌蕩久亦覺心胸闊所以閉柴荆微言終日閱

綠意軒

雜樹蔭庭除雨過如新沐曉日下簷際枕席生微綠霜清木葉老搖落一何速依依色不改猶有凌寒竹

三十六亭

樊南摘輿詞意旨獨殊絕方山與太常駢耦吾兼悅深夜紗燈旁辦香稿首藝亦欲涉風騷一一求流別登岸未有期敢云當捨筏

戲贈曲江

疎狂全未減落拓久無聊歸計空長鉞閒情付舞腰烏
絲親度曲紅燭看吹簫誰識樊川杜揚州廿四橋

愛爾如兄弟結交三載餘每憐同寂寞相與惜居諸霜

落驚鸚鵡風高躍鯉魚南山秋草白射虎意何如

曲江元

禮題畫有射虎雄心老
未空之語故有此句

和蒙泉有感二首

空山射虎一身輕誰見當年右北平解道灞陵多醉尉
將軍何事夜深行

杜宇聲聲夜月昏無情草木感秋原黃金解鍊長生藥
便乞刀圭與返魂

登臺望西山

城闕秋生凋旅顏登臺日夕鳥飛還碧天澹沲半雲雨
翠色有無千鬢髮昨夜

帝車回北斗傳聞

別苑駐西山何人詞賦陪

雕輦正宿長楊五柞間

卽景二首

長安新雨後蕭瑟暮天清落葉黃連巷寒山碧入城飢
鳥喧暝色遠雁帶秋聲促織身微細酸吟亦有情

燈火夜熒熒哦詩四壁清苦吟憐太瘦兀坐似忘情月

冷鴝鵒語霜寒鴟鵂驚起看雙寶劍挂壁竟無聲

與周闇章圍碁遂成長句

平生苦爲吟詩瘦未向碁經尋句讀閒中遊戲資一笑
落子丁丁消白晝據枰乍似賁育勇脫手全如風雨驟
不須步伐約三軍搏戰直前相踐蹂畧同穴鼠勇怯爭
何必率然首尾救忽然趨利賊上將俄已合圍逐窮寇
勢堅猶作蚍蜉撼局蹙偏憐困獸鬪紛紛潰卒指可掬
子子餘生出自竇游魚莫笑釜底逃巨網或亦吞舟漏
路盡已愁車擊轂尋隙仍思風入腴斂子方曠與尸歸
抵掌不殊凱歌奏外內空搆鄭門蛇王霸終分陳寶雉

枯槩三百通兵家九等元機自天授縱橫方罫盡變態
思苦不辭心腎鏤爛柯未必遇神仙木鑽去盤石盤何日
透我曹無事坐孤館紋楸一局邀朋舊喧闐雖似劍逐
蠅無心誰識雲出岫淪風水適相遭穀文蹙起微波
瀾須臾境過兩俱忘風本無聲水不皺勝固欣然敗亦
喜東坡妙語誠非謬試從能者較得失佩劍何妨分左
右興闌客散自下帷微風一綫沈煙逗

次韻張晴溪孝廉遊盤山八首

聞道田盤隱遺蹤在此山風流今寂寞巖壑自孱顏流
水何年隔白雲終古閒空餘天際望縹緲湧煙鬟

瀟灑張公子尋幽上翠微山光春染黛雲氣曉生衣路
轉千峯合泉鳴一練飛桃花正相待濃露未全晞
想爾三盤上危凌萬仞巔崎嶇無路處人影半天懸俯
視雲中鳥微分樹杪泉蒼茫高興發一嘯坐風前
正是春三月嵐光欲滴時濛濛空翠影一片碧琉璃躡
屨紆行入尋僧小坐遲禪房幽處好賞慰自應知
爲問拙庵後宗風今若何石龕新歲月禪榻舊煙蘿太
息支公去誰邀元度過青溝好風景知爾意偏多
聞有詩僧在門臨東澗開時時攜錫杖踏徧滿山苔心
與閒雲懶吟憑野鳥催可曾一相過煮茗唱酬來

日落山風急蕭森動客心飄然雙蠟屐還踏萬松陰巖
谷時傳響煙霞欲染襟遙知山水意回首暮雲深
苦愛盤山草坳堂逸興賒常思策竹杖同去嚼松花更
得高山曲攜來負月查十年塵土夢一夜入煙霞

對雨有作呈錢少司寇

匝地陰雲曉未晴蕭然獨坐閉柴荆天涯芳草愁相憶
塵匣瑤琴澀不鳴夢裏園林騎馬路病中風雨賣花聲
玉泉山下芙蓉渚一夜新流幾尺生

送郭石洲歸洛陽

風起盧溝萬柳斜河梁欲別曉啼鴉天涯春盡憐芳草

遠道人歸過落花游士真成蘇季子少年珍重賈長沙
含情一片長安月夜夜隨君共到家

游仙詩

昔有王子晉吹笙向緱嶺一遇浮邱伯飄然躡倒影輕
舉有夙心精誠宜自秉金石未爲堅天路豈云永無爲
畏險阻歲月逝鼎鼎緬彼乘鸞人喟焉獨引領

偶作

西川織錦鬬鮮新萬馬爭隨獨角鱗親記堯峯規戒語
漁洋原自有心人

雜述五首

大樂播元音帝王殊善美律呂雖不異中含升降理金石一和鳴鏗鏘皆悅耳分判判精微誰能分別此聞聲契古先感彼吳公子

左右佩劍者相笑無時休一言分楚越輾轉成累讐豈知述作士持論各有由刪詩存三百大旨歸溫柔三頌何唐皇小雅多幽愁

導河從積石九派分朝宗尋源旣一脈歸宿還相同支流各盤注何必求疏通但恐呂公子肆怒激天風驚濤忽四溢汗漫無終窮

播種資民生菽粟有真味淡泊血氣平粗糲彌堪貴畋

漁窮山海盤俎羅珍異萬錢供一食豈不暢心意但恐
饜飫餘美疾傷神志

清水有濁流直木有曲枝阿膠不能澄斤斧難與治事
勢遞相因轉變焉可知東家驚里人豈不緣西施逐貌
失本真淺見古所譏

吳孝婦詩

一封

丹詔下相藉慰辛酸早是黃金骨長埋白玉棺精靈悽
夜壑風雨冷刀瘢泉下逢姑舅音容雪涕看

作吳孝婦詩竟有感

感激增三嘆蛾眉有此人豈爛詩禮教况是綺羅身老
樹風偏急清秋露又新平生懷隱痛展轉竟難陳

羅酒歌和宋蒙泉

平生不飲如東坡銜盃已覺朱顏酡今日從君論酒味
何殊文士談兵戈往昔作客東光縣春風三月胡蘇河
主人好事攜美酒踏青邀我同相過芳草丰茸疊翡翠
幽禽尖咽如鳴梭風景貽蕩客心暢飲酣起舞爭婆娑
爾時意氣亦豪舉呼童一酌鸚鵡螺伯夷柳下共風調
滑流齒頰清而和形神酣適忘物我便擬倒甕傾滂沱
麴生風味真可憶主人云出陵州羅玉井蓮花釀珠露

漁洋當日留詩歌滄州亦有麻姑酒南川樓下臨盤渦
河心泉水清冷味小槽滴滴浮黃鵝有如少華連太華
肩隨未敢爭嵯峨自餘碌碌千萬種大岡小阜空陂陀
東海先生昔好事大徵名醞分其科章邱墨露推第一
品題未免成差訛此事十年在胸臆回首往日東流波
年來倚廬卧昏曉幽憂致病愁難瘥有疾飲酒禮雖許
忍云思此蠲煩疴比似清簾疎簾句枯禪不免長吟哦
偶然一品江瑤柱髯蘇聞此當云何

食棗雜詠六首

八月剝棗時檐瓦曬紅皺持此奉嘉賓爲物苦不厚豈

知備贊謁兼可登遵豆桂子不可食馨香徒滿袖
青蟲蝕老槐槐葉遂憔悴棗實朱離離蟲乃生其內在
外猶可除在內焉能制此物豈不微彌小彌堪畏
東海逢安期食棗大如瓜物類或殊常聞者以爲誇豈
知玉井蓮乃有十丈花鯢鵬談變化焉可疑南華
大棗不可食小棗甘如蜜種類畧不殊美惡焉能匹所
期適口腹安問形與質采采慎所求無爲以貌失
破棗觀其核中空無所有樂陵傳此種海內云無偶矯
揉事接植期以適人口千種無一生真性戕已久
披葉將引條蠹蠹鋒鋦直採摘不敢辭攀援焉可得殺

然露風骨緬彼君子德豈同灌莽中險阻生叢棘

題潘南田畫梅

畫梅用疎不用密疎枝易取風標逸潘郎獨作滿樹花
矯然彌覺清無匹勢隨橫幅作欹側偃蹇支離形不一
左側四枝風霜古瘦骨杈桹相拗捩右側三枝附根生
兩枝直上一枝屈中間老幹更倔強夭矯斜飛仍下拂
生綃四尺畫不盡突兀凌兢昂首出亂枝低亞倒露梢
空際盤孿猶彷彿小枝大枝盡著花萼附相銜比似櫛
皓然滿目但一色諦觀始覺姿態別開者如笑矜窮窳
落者如愁意蕭瑟欲謝不謝如低徊欲放不放如鬱結

向者如迎背如拒仰者如承俯如掇正如神女覲面逢
側如回眸忽一瞥攢如儔類爾我聚孤如微吟形影子
隔枝遙望如有情並蒂爭出如相軋盡態極妍不可計
安能逐象一一說摹神寫貌各入微因難見巧真奇絕
紫桃軒中兩瓣花老衲當年弄狡黠譬如飛燕與玉環
肥瘦誰能分優劣北宗衣鉢日塵土千里十洲遞瑣屑
南宗高簡矜風流流派或將繩墨軼左右佩劍更相笑
齊楚何分得與失豈知摩詰輞川圖梧桐正用雙鉤筆
循牆一日看百回羅浮仙人共丈室縞衣月下一嫣然
使我形神坐超忽人間畫手各擅場且憑蠻觸爭馳突

送內子歸寧

門外馬蕭蕭僕夫已引韉之子有遠行向曉征輪動中
懷忽悵觸展轉增沈痛昔日爾歸寧阿母倚門送舉手
引諸孫瀕行猶撫弄今日爾歸寧撫棺惟一慟秋塵生
總幃蛛網垂梁棟爾母雖他鄉還家悲喜共我母隔重
泉耿耿空魂夢入門三太息淚漬麻衣縫

瓦橋關

積水通瀛海雄關記瓦橋當年爭洛蜀此外付金遼世
閭邊功賤儒多戰氣銷北盟誰載筆猶忍話三朝
紀文達公遺集卷第九

紀文達公遺集卷第十

孫樹馨編校

三十六亭詩

陳簡肅公墓下作

一事堪千古椒山有舊明

公爲椒山先生同年椒山集

心人共見青史語偏增

史紀公臨終語留江陵事朝論關恩怨人才

係廢興故都禾黍後原自憶江陵

漁洋山人紀明人弔江陵詩曰恩怨盡時

方論定封疆
危日見才難

過景城憶劉光伯

故宅今何在遺書亦盡亡誰知馮道里曾似鄭公鄉三

傳分堅壘諸儒各辨香多君真北士敢議杜當陽

獻王陵

獻王陵上草蕭蕭時有村翁莫桂叔西到縣城三十里

土人行慣不知遙

凡道三十里內者側遣官

車駕巡幸先賢祠墓距輦

在翰林撰文日因祭文不及獻王移問禮曹覆云距縣城在三十里外

壬午順天鄉試分校硯

文章敢道眼分明遼海秋風愧友生惟有囊中留片石
敲來幸不帶銅聲

自題桐陰觀弈圖

不斷丁丁落子聲紋楸終日幾輸贏道人閒坐桐陰看

一笑涼風木末生

王菊莊藝菊圖

東籬千載後癖嗜似君無以菊爲名字隨花入畫圖秋
深人共淡香晚韻逾孤可要王宏輩重陽送一壺

友清軒新種梅花正開率成禁體四首

衙齋深閉海城隈春色驚看數點梅前輩風流已陳迹

幾年寥落又新栽

康熙甲申學使沈公種梅於此

寒燈久許邀君伴

兒次

汝傳讀書於此

冷蘂渾如待我開隔院桃花任撩亂祇因松竹

耦無猜

小別山坳與水隈偶來使院作官梅宛然靜女妝初罷

原 是 騷 人 手 自 栽 地 暖 誰 知 衝 雪 放 花 遲 轉 得 到 春 開

東 陽 瘦 骨 多 相 似 坐 料 形 骸 兩 不 猜

沈君柳堤下榻軒中

無 須 羯 鼓 爲 催 花 隨 意 欹 橫 數 朶 斜 冷 署 未 應 嫌 迫 仄
嚴 扃 猶 與 戒 喧 譁 此 間 賓 客 稀 塵 事 別 院 笙 歌 自 歲 華
待 取 焦 桐 彈 對 汝 七 分 尙 恐 八 琵琶

滿 城 火 樹 開 銀 花

時近元

獨 自 霜 枝 待 月 斜 憐 兩 風 標 清

有 味 消 人 意 氣 靜 無 譁 頻 牽 詞 客 三 更 夢 未 厭 衰 翁 兩

鬢 華

客年有最老者

一 任 旁 觀 嫌 淡 泊 更 如 昨 夜 演 琵琶

仙 游 道 中 曉 起 題 壁

春 山 曉 霽 散 步 林 隈 幽 鳥 自 眠 雜 花 半 開 微 風 冷 然 白

雲忽來我愛其間坐與徘徊

上杭人以竹黃製器頗工潔癸未冬按試汀州偶
得此篋戲題小詩二首

瘦骨碧檀欒頗識此君面誰信空洞中自藏心一片憑
君熨貼平展出分明看

本自汗青材裁爲几上器周旋翰墨間猶得近文字若
欲貯黃金簾乃陳留製

題從姪虞惇試帖

十年珥筆鳳凰池格律潛教小阮窺他日三條官燭下

諸公應識紀家詩

試帖多尙典贍余始變爲意格運
題館閣諸公每呼此體爲紀家詩

自閩回里築對雲樓成偶題

還鄉翻似到天涯
築得書樓便作家
偶睇郊原成野趣
擬從田老課桑麻

長夏雲峯入望深
軒開四面好憑襟
兒曹莫笑村居隘
兩載經營一片心

寄壽徐筠亭先生

生日詩列吟卷中
誰歟倡者羅江東
此風一扇八百載
吳牋壁畫丹砂紅
震川先生稱鉅手
更以壽序煩鐫工
銀屏錦幃八背簡
文格破碎從嘉隆
生平偃蹇懶爲此
捉刀往往聽兒童
胡爲一旦破戒律
手題長句封郵筒

筠亭先生天下士牙籤萬軸羅心胸暮年戒養古曾閔
早歲爲牧今黃翼行年七十老無恙蒼顏白髮柯青銅
我家舊宅近橫海早聞父老談清風到閩兩載未相識
伊人秋水無由從赤霄麟鳳衆所望尺素頻托微波通
親撰杖屨吾尙願何況片楮勞雕蟲樂全先生鐵拄杖
寄詩原有東坡翁其人顧視何如耳寧云一律從同同
梅崖居士今鉅筆蹴踏揚馬如奴僮頗聞文字慎許可
寸莛未許縱洪鐘獨於先生一傾倒昌黎東野相雲龍
定知亦有文爲壽華鯨相與鳴春容老友黃公今健否
鷗冠憤憤非真聾此客嚴冷頗難致祝君想亦親扶筇

因君問訊道好在爲我一勸琉璃鍾

杜節婦詩

胡建寅
繼妻

清節胡威裔高門杜預家素心標潔白淑德頌柔嘉
早歲吟黃鵠餘年啓絳紗五龍山畔樹開徧女貞花

蕃騎射獵圖

白草粘天野獸肥彎弧愛爾馬如飛何當快飲黃羊血
一上天山雪打圍

書贈毛副戎

雄心老去漸頽唐醉臥將軍古戰場半夜醒來吹鐵笛
滿天明月滿林霜

辛卯六月自烏魯木齊歸囊留一硯題二十八字
識之

枯硯無嫌似鐵頑相隨曾出玉門關
龍沙萬里交游少祇爾多情共往還

松巖老友遠來省予偶出印譜索題感賦長句

陽關西出二載餘歸來再直承明廬
艱難坎坷意氣減閉門漸與交游疎
西風昨夜到梧葉悽然白露滋庭蕪
軒車雖復謝時輩觴詠頗亦思吾徒
門前剝啄者誰子昂藏老鶴清而癯
故人忽自天半落踉蹌躡屐遙相呼
憶昔把酒談篆刻布衣之舊晨昏俱
迢迢一別十六載

秋鴻未寄尺素書誰知古道淡以久形骸雖隔心相於
聞我生還如再世霜華漸欲侵髭鬚常恐從此相見少
不辭策蹇紆長途我聞握手再三嘆蒼茫百感交斯須
誰言草野貧賤士乃能不逐炎涼趨古云書畫繫人品
天然高致非臨摹豈知一藝能造極立身亦與常人殊
向來知子殊不盡但誇鐵筆鐫蟲魚題詩擬續印人傳
較工論拙徒區區舊題松巖印譜有他年誰續印人傳
印人傳惜哉不遇周侍郎句如今始
識天下士此人此藝今皆無幸子老眼尙如鏡君七十
二歲尙
能鐫莫辭寸鐵磨昆吾晴窗爲我鏤山骨長揖顏籀相
小印爭驅他年片石以人重姓名託子留寰區

辛卯十月再入翰林戲書所用玉井硯背

萬里從軍鬢欲斑歸來重復上蓬山
自憐詩思如枯井猶自崎嶇一硯間

有以八仙圖求題者韓何對弈五仙旁觀而李沈
睡焉爲賦二詩

十八年來閱宦途此心久似水中鳧
如何纔踏春明路又看仙人對弈圖

局中局外兩沈吟猶是人間勝負心
那似頑仙癡不省春風蝴蝶睡鄉深

己卯秋錢塘沈生寫余照先師董文恪公爲補幽

篁獨坐圖今四十年矣偶取展觀感懷今昔因題

長句

我家京國四十年俗情入骨醫難痊堂多隙地居無竹
此君未省曾周旋先生此畫竟何意忽然置我幽篁間
當時稽首問所以淋漓潑墨笑不言毋乃怪我趨營猛
諷我宴坐娛林泉拈花微笑雖默解拂衣未忍猶留連
人生快意果有失一蹶萬里隨戎旃孤城獨上望大漠
決滸沙氣黃無邊慨然念此畫中景有如縹緲三神山
枯魚書札寄魴鱖風波一失何時還玉門誰料竟生入
鳴珂又許趨仙班歸來展卷如再世羊公重認黃金環

少年意氣已蕭索傷禽寧望高飛翻但思臣罪當廢棄
驂鸞忽躡蓬萊巔友朋知己尙必報况乃

聖主恩如天文章雖愧日荒落江淹才盡非從前石渠
天祿勤校錄尙冀勉滌平生愆以此躊躇未能去故人
空寄歸來篇湖州妙迹挂素壁風枝露葉橫蒼煙彈琴
長嘯懸明月相從但恐終無緣畫雖似我我非畫對之
仍作他人觀盤陀石上者誰子杳然相望如神仙

已卯六月先師董文恪公招余飲醉中爲作秋林
覓句圖後余至烏魯木齊城西有坤司馬所建秀
野亭案牘之暇獨步其間喬木捎雲宛然此景始

知人生有數早兆於十載前矣歸來重閱俯仰慨然因題二絕句

霜葉微黃石骨青孤吟自怪太零丁誰知早作西行讖
老木寒雲秀野亭

歸來壁上拭埃塵粉墨猶存舊寫真指與兒童渾不識
朱顏非復畫中人

送汪劍潭南歸

探珠合浦水采玉崑崙邱天琛世所羨豈不窮冥搜陸
離燦百寶安得一一收所以盛明世奇士時淹留常情
多感慨達識無怨尤遇合各有期蘭菊殊春秋汪子貧

奇調巨海吟蒼虬風波偶蹈躑歸買淮南舟長安居不
易無計爲子謀潞河千里水送子心悠悠努力勤自愛
舊業重研求駿足皆得路豈獨遺驂騶三年一彈指挾
策來

皇州岩堯蓬山頂偕子驂鸞游

醉鍾馗圖爲曹慕堂同年題

一夢荒唐事有無吳生粉本幾臨摹紛紛畫手多新樣
又道先生是酒徒

午日家家蒲酒香終南進士亦壺觴太平時節無妖癘
任爾閒游到醉鄉

題羅兩峯鬼趣圖

文士例好奇八極思旁驚萬象心雕鏤抉摘到邱墓柴

桑高尙人冲澹遺塵慮及其續搜神乃論幽明故淵明作搜

神後記以續干寶之書豈曰圖神姦將以資禁禦平生意孤迥幽

興聊茲寓此畫誰所作陰風生絹素慘淡有無中睽睨

吁可怖大矣天地間變態靡不具耳目所未經安得窮

其數儒生辨真妄正色援章句爲謝臯比人說鬼亦多

趣

題羅兩峯歸帆圖

胷中奇氣蟠蛟螭蹉跎乃作老畫師逢時以畫已自惜

况於落拓難逢時秋聲昨夜到庭樹蒼苔滿院吟蟲悲
墨君堂冷人迹少牡丹終不塗胭脂禿毫敗楮自寫照
孤帆一片天之涯斜陽不語光錯落寒雲無色氣慘悽
數筆草草暈淡墨中有萬古騷人思我來相訪掃塵榻
默默坐讀無聲詩嗟我之子且小住吾曹數輩猶追隨
他時鼓棹煙水外沙鷗蘆雁知君誰

題陳君小照三首

老圃秋容晏坐餘一邱一壑意蕭疎到頭不恨青袍誤
投老空山尙把書

百花只有黃花淡畫裏纔容寫數枝料得肝腸都似雪

平生不解買胭脂

科頭偃蹇坐雲根短短疎籬靜掩門莫怪元龍豪氣盡
功名久已付兒孫

斷碑硯歌爲裘漫士先生作

斷碑者宋熙寧四年蘇文忠公爲孫吳興

作墨妙亭詩石刻也存十二字凡四行行三字曰
鑑他年曰憶賀監曰時須眼曰孫莘老高廣各三
寸長四寸王文成公得之以背面作硯左刻守仁
二楷字右刻篆書陽明山人四字側刻分書驛丞
署尾硯五字蓋明正德元年文成謫貴州龍場時
物也漫士先生旣爲之贊且銘矣屬作長歌紀事

神物不受劫火燔姚江之硯今猶存摩挲題識已可敬
况復東坡居士留手痕斑斑墨繡閣幾姓觚棱剝缺塵
埃昏一朝天遣八公手文綈重襲如璵璠兩公卓犖天

下士平生學問皆與洛間殊淵源古來豪傑各有見安
能一一俱以繩尺論黃龍紫鳳自上瑞寧知摩天浴海
尙有鵬與鯤輸攻墨守各師說宋明兩代紛囂喧惟公
曠世具巨眼埽除門戶存公言公銘有吾於東坡不師
其經濟而師其文章吾
於陽明不師其學
而師其事功語乃知此硯出有意將以乞公一字爲
平反中間莘老頗異趣當年調笑王孫猿姓名偶得挂
石角有如蒼蠅附驥千里奔公能置之不論不議列想
見胷中雲夢八九吞我從侍坐睹法物凜然再拜不敢
捫竊爲此硯慶所遇流連誼歎不覺其詞繁有形自古
無不盡惟有文章之壽不隨萬物歸其根千秋萬世石

可泐此銘此贊永永留乾坤

漫士先生繪斷碑硯圖敬題其後

我聞石田翁奮筆畫擊硯硯碎訇霹靂聲涌出驚谿絹此
硯劫火餘殘缺不存半云何撫題識片石人猶玩文章
緬眉山事業憶新建手迹賸依稀其人如可見公從何
處得法物神明煥珍重付畫師真形圖四面公於三代
器過眼逾千萬斷碣數寸餘視之何眷眷繇邈思古人
寄託申素願畢然千載心寫之銘與贊彈指六百年瞥
眼逝如電一會想靈山儼然猶未散

曹慕堂光祿席上贈張白菴卽以送別

不料晉舊飲斯人肯見尋鬚眉留古色天地入孤吟牢
落塵中迹蒼茫物外心寒暄都未及先自話登臨
踏遍天涯路燕郊上古臺一囊貯山水雙屐帶莓苔問
子將何適言余是偶來孤雲無住着野鶴任徘徊
珥筆金華殿飛騰盡馬揚美人弄蘅杜秋水隔瀟湘風
雅寧殊調雲龍且共翔他時清夜直應憶孟襄陽

先師介野園先生壬午春扈從西湖以詩扇寄示
俄聞負杖逍遙矣蓋絕筆也壬辰長夏偶於笥中
見之不勝存亡之感追和二絕不知涕淚之縱橫
也

徑跨鯨魚汗漫遊
朱門客散冷如秋
十年梅雨泥金駝
尚有詩情扇上留

劉井柯亭事事新
瀛洲不改舊時春
侯芭灑淚收遺草
頭白門生賸幾人

寄示閩中諸子六首

督學閩中愧無善狀而諸生有一日之知者詣
公車必過相存問其不能至京師者書題亦絡
繹不絕信閩俗之篤師友也余懶且病不能一
一作報書而其意又不可不報因作詩六章屬
梁子攜以歸有相問者梁子其爲我誦之

平生無寸長愛才乃成癖每逢一士佳如獲百朋錫甲

乙手自評朱墨紛狼籍

諸幕友以墨筆閱卷余以朱筆覆勘之塗乙縱橫或相違異聞

士子習見不怪也

雖不接笑言宛然共晨夕別來八九年姓名

心歷歷每遇閩嶠人慨焉懷曩昔

鐵網織千絲持以臨滄海珊瑚萬萬株安能一一采遺

才良已多事後恒追悔尙喜所已收頗足敵崇愷森竦

七尺枝萬目炫光彩貢篚耀天琛聲價今無改

數科以來登第

者指不勝屈學使三易所甲乙亦無大同異也

芳蘭春已茁黃菊秋葳蕤馨香初不異滋長各有期諸
子皆南金寶礦光陸離云何閱數載窮達理不齊素修

苟勿怠遇合終及時君看延平劍變化何神奇

藝禾待其稔種木待其榮殷勤羅國士實亦期其成豈
曰植桃李持以誇公卿文章達世用所冀爲國楨經濟
緬忠定道德尊考亭抗懷思古昔日月懸高名

昔陟鼓山巔東望大海水萬派匯歸墟有本故如是我
雖詞賦人雕蟲爭綺靡側聞師友訓頗解文章理六藝
濬淵源五倫固根柢作者無幸傳最矣諸君子

迢遞隔山川音書時睽睽感此金石心不逐升沈變

余

宮以修節子

深情何所酬贈以勤無倦鼎彝登廟廊追

溯工師鍊他年因子傳已荷榮施萬努力副所期何必

時相見

題吳香亭古藤詩思圖

藤爲新城王文簡公手植

三才萬象窮梳爬詩翁秀句含天葩瓊箋九萬寫不盡
餘香散作庭中花天矯老幹三十尺蛟螭倔強相盤拏
炎天韞韞張翠幄春風裊裊吹紫霞老仙一去六十載
孤根半被莓苔遮烏衣燕子銜落葉蒼涼已使人咨嗟
云何瞥眼更小劫剪伐不遺留枯槎花神夜泣紅淚盡
離魂何處愁天涯豈知一物有顯晦冰霜閱徧逢春華
蘭成宋玉遠相繼舊宅仍是詞人家鶴林天女忽自返
嫣然一笑窺窗紗始知神物終有待人間斤斧焉能加

昨秋乘興偶過訪滿庭綠影紛橫斜三生石上恍相遇
牽蘿翠袖真無差所惜不及花正放恨無羯鼓冬冬搥
相期待取蜚英會醉看珠璣垂檐牙淵明何事又卜宅
徒留空館樓昏鴉有形自古無不盡電光過眼飛金蛇
長留但有文章壽流傳往往千年賒敬愛寺藤無寸蔓
東川詩句今猶夸此藤縱落他人手飄零賤視如蓬葭
得公一記足不朽其壽已比恒河沙漁洋有靈應起舞
吾花不枉重萌芽惜哉手種羊城樹欲子見之山川遐

讀小元和鶉衣子傳戲題轉韻

聲聲鵲鳩東風急瞥眼飛紅覓不及蝶衣粉褪碎襪襪

香魂猶抱空枝泣斜陽芳草誰長吟別鶴一曲傷春心
手中尺半鐵綽板鑄成曾費千黃金可憐破衲重重補
不是尋常春線縷柔情宛轉引成絲百折千迴無處數
纏頭十萬酣春風傾家買笑寧惟公乞食落魄不自諱
嗟哉兀傲真英雄聞有丹青傳好事吾雖未見知其意
綠慘紅愁兒女情天高地闊風雲氣

題同年謝寶樹小照

往者詣公車爾我憐同調馬上慘綠衫翩翩兩年少中
間各仕宦人事紛繚繞彈指廿六秋駒隙忽停照秦中
暫相遇我正適邊徼草草敘悲歡未暇觀顏貌生還荷

聖慈重待金門詔君亦方內遷握手再一笑自憐雙鬢
改對鏡愁焉悼看君鸞鶴姿尙與當年肖寫真入畫圖
明月清光耀花樹陰翳如微風吟萬竅朱顏發春醅宴
坐恣歌嘯自是丰神佳非關畫手妙盛衰寧有常年齒
何足較展卷一慨然榮枯隨所蹈

胡子同旋粵乞詩爲其母壽因作長句卽以贈別
海山春簸風濤音滔滔太古流至今成連鼓楫不到此
誰能寫入焦桐琴祝融靈怪久鬱勃奇柯忽挺珊瑚林
錦囊驢背詩一卷吞吐萬里南溟深云何寶礦獻不受
翻然高唱游子吟客舟初戛鴉軋櫓歸夢已聽鉤輅禽

八千里路未爲遠到家纔及秋蕭森高堂且喜娛白髮
空囊莫恨無黃金烹魚煮荀亦足養孝子何必皆華簪
况乃胡威舊清節鐵骨不受風霜侵當年能與共寒餓
此時寧復嗟升沈行矣吾子勉自愛羽陵蠹簡勤蒐尋
忠孝力奉孔孟戒文章一洗齊梁淫蔚然挺作國士器
雖貧足慰慈母心何嫌此度偶落羽臨行辜負縫衣鍼
儻逢暇日風景好板輿奉侍枕椰陰誦我此語爲母壽
云我贈別兼規箴老人聞此定一笑不辭椰酒頻頻斟

題孝友圖十韻

忍凍不自言委曲全終始人心得所安大義固如此世

俗以爲難蓋未知閔子

閔子

老萊辭相印萬事等脫屣惟此色養心頭白未能已乃

知高隱人本不違倫理

老萊子

糞除亦子職辛苦何足言哀爾帶下土洒以涕淚痕彼

哉功名士但掃丞相門

薛包

脫衣欲剖冰事附呂虔傳寒魚儻可炙天性亦已見僵

臥事太奇稗史徒淆亂

王祥

天地在人心一念變寒暑草木本無情疏甲爲之吐神

感契至精勿以艱難阻

劉殷

梁公望白雲慨焉增遠慕問予胡不歸直以干役故千

載宦遊人對此一躊躇

狄仁傑孫世謨案躊音注見九辯及漢武帝李夫人賦

一讓杜百爭此語古所說衆志苟先睽萬忍終一決我

謂張公家究由明禮節

張公藝

狗苟固其性禮義誰教之和氣所蒸濡人物兩不知嗟

彼河東人區區徒爾爲

陳兢

臺笠徧東菑寧止恒沙數幾人勤耒耜但以高堂故莫

訝獨此君丹青傳絹素

李玘

葛蔓連葛根寧斷嬌兒乳艷曲寫吳歎兒女昵昵語此

念移之親人各足千古

長孫氏

題王紫湘小照四首

來往東華蹋輭紅幾回握手總匆匆今宵吟對梧桐影
十載相思到畫中

隨緣偶現宰官身山水閒情付寫真清露新桐王阿大
翛然忽對六朝人

一院清陰亞綠雲更無人跡破苔紋此間好著漁洋句
只恐桐花是使君

撫卷夷猶悵有思吟成便是送君時潮平月落如相憶
好遣瓊瓏唱我詩

自題校勘四庫全書硯

檢校牙籤十萬餘濡毫滴瀝玉蟾蜍汗青頭白休相笑

曾讀人間未見書

寄董曲江

五緯宵明壁府寬風雲翕合競彈冠相攜諸子蓬萊島
時憶先生苜蓿盤名士爲官原灑落詞人垂老半飢寒
祇應雪夜哦新句且付彭城魏衍看

題黃莘田硯

詩人藏十硯憔悴臥蓬廬零落惟餘此殷勤遠寄予槐
廳供視草藜閣伴讐書一片韓陵石相看未忍疎

鄭編修

際唐

出其曾祖 賜硯見示敬賦古詩二

十六韻

三江注大瀛良維鍾濫氣珠胎既煒煌硯璞尤瑰異土
貢或效珍詞臣恒拜

賜榮逾青鐵頒品勝紅絲膩什襲侔天琛子孫守不替
小臣獲敬觀幸睹

帝鴻製其陽作墨池巧借篆刻字其陰

龍畫分

奎藻親銘識申明延年理闡示新民義一物不徒然道
也寓諸器側聞蒙

賚時初服久已遂固宜戒頤養俾作

熙朝瑞云何林下人兼勉淑斯世

寓訓當有由沈思今閱歲偶披蒼姬典乃悟

聖人意司徒佐廟廊固贊時雍治退爲鄉大夫繫寧型
子弟里閭後進風多秉老成議著書宣
教化是亦儒臣事仰惟

賚予心實切風俗計非以翰墨資徒佐文章麗康成逝
已遙小同經術繼簪毫步玉堂倬直登
丹地鴻寶藉世傳奉持其勿墜永言念
聖恩黽勉繩先志他日躋

綸扉用茲當

內制

秋海棠和吳興徐芷塘韻

靈妃一笑影便娟雙頰桃花記儼然無語自含愁
眠眠有情時作舞僂僂綠窗人靜憑誰賞翠袖天寒最汝憐
珍重西風好相惜莫教憔悴不成妍

眼鏡

暗中摸索敢相誇未老先看霧裏花
眼作琉璃君莫笑尙愁人道是紅紗

題張桂岩壽星納涼圖

南極老人科頭坐西堂強使加冠巾
尤西堂有帶巾壽星圖贊張郎
今又弄狡獪遺作解衣槃礴人
神仙游戲誰能測

優閒良亦得由來老子外形骸一任少年塗粉墨

汪水部

啓淑

綿潭山館十詠

葆真堂

羣動紛營營機巧日相勝徒云抵彼瑕寧識滴吾性至
道以拙存愛汝心無競

訥庵

非曰善藏機隱諸深不測亦非防忤物徒貴守其默多
論懼少成茲懷誰得識

翠香閣

陰森翳虛閣老柏霜根盤晚翠異桃李真香非麝蘭誰

於人境外愛此空林寒

律素書廳

曩校玉字書時逢君所獻七畧簡汰餘猶多人未見津
逮者伊誰山深雲漫漫

息軒

貴賤皆有營百歲誰得閒但使妄念淨卽爲善閉關古
來恬退人不在居深山

嘯雲樓

木杪露飛簷四圍雲泱泱何來鸞鳳音風散空山響知
有倚樓人翛然百尺上

蓼陽茨室

老屋縛香茅開軒臨水北門前紅蓼花搖映玻璃碧秋色亦復佳何必芙蓉國

待月簃

清光澄萬慮妙悟靜者知娟娟松際月若與幽人期想見風露中支策微哦時

莓逕

汲水養蒼苔一室自高臥時防俗客來踏我綠雲破惟有羊與求無妨躡屐過

澤花腴菜井

樟泉灌菰韭本爲口腹計騷客愛馨香兼以滋蘭蕙是爲文士園事與農家異

蔡葛山相國澄懷二十友圖

縹緲樓臺入紫煙羣真散坐大羅天俯看海水明如鏡尙覺蓬萊是地仙

鬚眉點染宛如真一一從頭認故人祇訝高年文潞國如今更比畫精神

甲辰會闈初定草榜偶作二首

甲乙編排幾度更藥珠仙榜造初成范韓本自無私見瑜亮纔能得定評隔幕聞歌先擊節垂簾對影未知名

旁人應笑耽花癖剛到含苞便有情

老眼摩挲力欲殫今朝草創九還丹

唐人試院詩有九轉丹成鼎未開句

李太白集有草創大還丹詩

杜詩韓筆都堪愛王後盧前恐未安相

馬爭誇塵外賞觀棋誰信局中難牟尼百八加贏二顆
顆曾經子細看

定榜後題所取未中諸卷

縱橫朱墨委塵埃臨到緘題更一開花是親栽皆愛惜
鶴因遠別暫徘徊書生遇合雖由命

聖代公明豈棄才荏苒三年一彈指龍門結隊駕風雷

爲素菊主人題圖

詩人例有山水癖十岳誰能身徧歷朱門况復似海深
何由躡屐尋泉石寧知宗炳善臥游巧縮林巒歸咫尺
三生夙結翰墨緣千金屢博丹青跡花亭竹榭蜃窗明
展卷煙嵐生四壁錦暉防浣寒具油預遣當關謝俗客
良朋三四未爲多斐几筠簾同岸幘酒殺絃管都不陳
清賞須教塵念滌惟應佛界真旃檀銀葉微煎薰几席
定知神往巖壑間如踏青鞋橫櫛栗惜哉此會我不逢
徒想風流共晨夕徘徊戲問圖中人爾時曾否嫌岑寂
畫雖不語吾心知人生各自適其適

題常理齋愛吟草

理齋名紀奉天承德人乾隆丁丑進士四川崇慶州知州殉木

果木
之雜

如公纔不負詩書碧血淋漓苦戰餘一劍焉能支叛黨
三年原只掌軍儲鵲啼蜀道悲荒壘鶴返遼東認舊廬
記得小凌河畔句平生最慕賀醫閭

見集中望醫巫閭山及小凌河詩

題吳香亭春郊歸省圖

爲扈鉤陳

匪因瞻丙舍田馬嘶春驛柳人帶

御爐煙畫錦添新記瀧岡表舊阡

恩榮真罕遇宜作畫圖傳

自返春明路於今十六秋吟詩披粉繪回首感松楸何

曰承

丹詔如君躍紫駟亦將歸省卷題句索相酬

題伊雲林光祿梅花書屋圖

橫斜疎影漸成林
岩曲纔留一徑尋
老屋何年栽雪夢
先生原自抱冰心
詩吟和靖閒情遠
畫倩華光妙手臨
說到百花頭上句
猶憐未免世情深

宦游十載別煙嵐
畫裏時看結草庵
最憶寒叢花第一
曾偕皓魄影成三
羅浮入夢人將老
月觀橫枝句更參
誰爲丈人慰鄉思
芳馨遠寄自江南

爲伊墨卿題黃癭瓢畫冊十二首

幽花宛洛神微步澄波上云何視其根蠹菌如斯狀菁

華多內含米可以皮相

水仙

微蟲亦有營往來紛不止自人俯視之但見蠕蠕耳神

仙視我曹當亦如斯矣

螻蟻

秋籬豆莢肥色味香皆好登盤不厭多所畫何其少偶

寄疎野懷本不期君飽

豆莢

馬遷似杜甫珖柱似荔支相似在何處悟者心自知誰

與歐陽子一品常建詩

螺蛤

未足供佛印寧可贈米顛胡以彭亨狀寫照玉版牋當

由鱗皴意一一皆天然

海石

嫩菌含清香新筍饒甘脆惟有山居人飽餐風露氣憶
泛建溪船曾經知此味筍

毒與蠱尾同兼之傳以翼然其所構房入藥殊多益乃

悟駕馭權貪詐均可役

蜂房

宴坐耆閣崛隔石摩阿難金容不可睹得此一掌看我

手何如佛是畫作是觀

佛手柑

誤記杜陵詩偶忘莊叟語或云考證疎吾謂意有取朝
四而暮三茲風原不古

梨栗

來時不及春厥實乃蕃衍天以結子多補爾開花晚觀

化悟盈虛萬事皆可遣

石榴

百世迅風燈瞥眼卽成故佛法超死生乃亦有過去如
何指一隅云是吾常住輞川尙有圖莊竟在何處達者
知其然澄觀心有悟昔未屬我前閔主已無數過此落
誰手應亦聽所遇且隨現在緣領此當前趣翻階嬾娜
花遶屋扶疎樹高卧到羲皇餘者何須顧

覃溪前輩出竹垞西河兩先生像索詩

山碧湖光結伴尋六橋煙月對清吟詩家未可輕臺閣
此是康熙兩翰林

二老風流寄畫圖生綃淡墨幾傳摹吾曹亦似書中蠹
可得他年寫照無

石庵相國手書卷子以贈芸楣尙書季子

蕭升

裝

池後芸楣索題爲成四絕

走馬裁詩作意誇舊傳雛鳳在桐花誰知慧業無窮盡
八歲今稱賞鑒家

大令風流接右軍筆圖早擬授羊欣珍藏一卷詩中畫
也抵當年白練裙

四聲五歲便能知驥子時聞誦父詩今爲劉公作嘉話
家鷄野鷺可相疑

小姑天遣嫁彭郎紅袖時縈翰墨香生得佳兒遽如許
定知解誦魯靈光

汪氏雙節詩

客從南方來貽我越女錄夜深偶披卷酸惻難卒讀如
彈寡女絲幽咽吟黃鵠悲風生字裏慘澹秋鐙綠百感
忽蒼茫慷慨交心曲紅閨多薄命少小嬰荼毒茹痛就
黃壚凋零隨草木其間幸傳者恒沙中一刳是由局外
人身未罹瑩獨如彼飫膏粱不知藜藿腹乍見雖咨嗟
煙雲旋過目誰能勞筆硯一一登簡牘君子胡爲者蒐
此無瑕玉願以金管豪徧寫汗青竹遂使九幽魄炳若
三光燭自云孤露早零丁悲慘酷風雨日飄搖廬舍幾
顛覆所幸拒秋霜未殞凌寒菊四壁僅存留兩母親鞠

育聆音問疴癢節口營饘粥悽涼對紡瓦涕泣開書篋
懷冰不畏寒對榻互相勗萬苦極顛連一綫幸延續青
雲獲致身墨綬今沾祿悲哉不逮養寸心撰萬鏃回憶
困躓時艱辛皆目矚碑狀雖連篇十纔存五六其餘瑣
屑情多若筍成束口所不能言惟有腸轉轂緣此感余
懷耿耿如根觸瀨水流相合驚禽鳴相逐同病多相憐
疾痛如連屬懷鉛詢耆舊洒淚談貞淑擬因中壘傳代
寫臯魚哭我聞爲太息遺事重三復古來閨閣人鉛華
耀羅縠風花逝不停搖落何其速惟此貞烈心長存偕
岳瀆人紀賴以立撐拄同鼇足惟嗟名姓湮寂寞歸原

麓君能力表章不惜霜豪禿足知兩母前此義聞之熟
想見松與柏風霜交謾謾爲君述慈範握管容先肅他
日輶軒采或當登史局煌煌列女傳千載藏瑤櫝

銅雀瓦硯歌

銅雀臺址頽無遺何乃賸瓦多如斯文人例有嗜奇癖
心知其妄姑自欺齊徵魯鼎甘受贗宋珍燕石恒遭嗤
西隣迂叟舊蓄此寶如商鬲周尊彝飢來持以易斗粟
強置之去不得辭背文凸起建安字額鐫坡谷諸銘詞
平生雅不信古物時或啓櫝先顰眉他時偶爾取一試
覺與筆墨頗相宜惜其本質原不惡俗工強使生瘡癢

急呼奴子具礪石階前交手相磨治瑩然頓見真面目
對之方覺心神怡友朋驟見駭且笑謂如方竹加圓規
三國距今二千載胡桃油事誰見之況乃陶家日作僞
實非出自漳河湄諸君莫笑殺風景大學石鼓吾猶疑
嘻大學石鼓吾猶疑

菱花硯

端州紫玉出新坑琢得菱花似鑄成相對無嫌常墨墨
妍媸原忌太分明

劉文正公舊硯

硯材何用米顛評片石流傳授受明此是乾隆辛卯歲

醉翁親付老門生

蔣秋吟畫

買得漁莊近釣磯
每逢風浪便先歸
門前萬里長江水
一任驚帆片片飛

蘇虛谷墨竹

曾記湖州派親傳
玉局至今老孫子
仍有舊家風意
出枝極外神留蕭瑟中
平生疎落性原與此君同
貧已惟存骨高原不畏寒
偶然醉醺醺隨意寫琅玕
飄泊孤筇在刁騷
短髮幾分明霜月下照
取瘦容看

畫紅豆詞後

翦翦西風滿院秋
斷腸花冷小窗幽
瓊龍骰子緣誰賦
大抵詞人總善愁

摩詰前身是畫師
高情多在輞川詩
誰知勸采相思子
也唱春來發幾枝

虞惇從姪臨行以課兒圖索題走筆爲書四十字
臨別披圖畫蒼茫有所思
一經還是舊兩鬢已如斯
晏坐涼颼入清吟稚子隨穆然懷爾父把卷課兒時

張桂巖桑葉飼蠶畫扇題示次女

花壓闌干繡閣春
朱門多少綺羅人
頻將畫扇時時看
知有蠶娘最苦辛

爲墨卿題扇

風露夜清幽花自吐與澹泊人結塵外侶人本無心花亦不語月白空庭寥寥太古

題雲葉表弟小照

此老今如此蒼茫百感生中年雙鬢改空谷一身行白石炊難熟黃金鍊未成祇應拾瑤草且自慰幽情
彈指繁華歇居然野客形三生香未燼一枕夢初醒散步隨蝴蝶攜鐙訪茯苓君看趺坐處滿眼好山青

書灤陽消暑錄後

半生心力坐消磨紙上煙雲過眼多擬築書倉今老矣

祇應說鬼似東坡

前因後果驗無差
瑣記蒐羅鬼一車
傳語洛閩門弟子
稗官原不入儒家

蔣春農舍人寄硯摩挲古澤如見故人蓋自壬午
江干一別彈指二十八年矣遠想慨然因題一絕
斑斑墨繡自何時
老友封題遠見貽
忽似重逢孟東野
古心古貌對談詩

題閩中校士硯

舊游回首似前身
彈指流光廿八春
爲問成陰桃李樹
可能還憶種花人

題友人小照

詩酒流連遇主賓
蘇門六子總詞人
兩翁相對清如鶴

東坡句

畢竟東坡愛潁濱

聽秋聽雨一般聽
古畫從來不畫形
解得聯牀同話意
不妨象外看丹青

秋眠共被似姜肱
莫話升沈百感生
五相一漁翁對飲
友朋尙不論功名

蕭瑟秋聲動客心
披闌想像對清吟
自憐老去頭如雪
空憶當年子敬琴

達齋司寇習射圖

幾度銅符調羽林雙韃未蹋陣雲深誰知坐撚金鉞看
原有驍騰萬里心

玉韞時攀月一彎鳴骹不是爲消閒
八旬天子勤秋獮親見年年到朶顏

惺齋騎牛圖

扣角長歌入翠微清風兩袖薜蘿衣知君留得時苗犢
只跨疲羸老牸歸

颯颯空山木葉零武夷秋老萬峯青騎牛欲向何方去
定蹋寒雲上幔亭

炊熟黃梁好夢殘烏犍到處且盤桓天台雁蕩如重過

認否當年舊宰官

相逢沈范兩尙書記得何郎得意初畫裏於今頭欲白

誰人曾見詠芙蓉

韓城相國先爲題句相國與余前後督學閩中於君均有國士之目

寄懷蔣春農舍人

北風吹雪滿船頭別後江山幾度秋爲問如今三徑裏
何人來往似羊求

爲王秋塍題天寒雅集圖

修禊蘭亭醉本留衰翁猶記舊風流

舊與尊甫文酒往還陶然亭修禊一

會唱和

祇今零落惟存我又看烏衣子弟游

西園圖記墨痕新畫裏相看意氣親喜汝多年拖墨綬

招邀仍是舊詞人

送朝鮮使臣柳得恭歸國

古有鷄林相能知白傅詩俗原嫻賦詠汝更富文辭序
謝三都賦才慚一字師唯應期再至時說小姑祠

送朝鮮使臣朴齊家歸國

貢篚趨王會詩囊貯使車清姿真海鶴秀語總天葩歸
國憐晁監題詩感趙驂他年相憶處東向望丹霞

鐵冶亭玉闥峯兩學士聯牀對雨圖

北門近接星垣開翰林重自唐以來中間職掌雖小異
大都皆是神仙才經綸屢見資稷契文章豈但誇鄒枚

一佛出世已罕觀況乃棣萼連枝栽奇絕君家好兄弟
花飄聯步相追陪精金躍冶淬千鑢寶璞出水皆瓊瑰
雙飛爭睇摩霄翼一門自作同岑苔東坡發唱潁濱和
詩成不待擊鉢催西清退直口對榻不知塵海人喧逐
希聲蓄寶難自閔十聯秀句經

天裁

帝求梁棟贊醲化二龍並躍乘春雷弟掌

絲綸登禁闥兄司禮樂升容臺鳳巢已隔痕漸掃浮屠
桑下何殊哉胡爲寫照倩畫手瀛洲回首猶徘徊翰墨
因緣智慧果三生結習從胚胎正似平園老居士已登

黃閣居中台玉堂雜記親手錄舊游終不忘蓬萊我別

東觀越十載

余己亥自詹事擢內閣學士始出翰林

顛毛種種驚衰頽年

來更覺詩興減筆牀硯匣生浮埃偶然披卷一根觸含
毫欲詠凡幾回心如廢井苦枯澀一篇勉綴今朝纔江
郎老矣無好句塗鴉聊以資詠吟

聖朝館閣富俊彥一時巨手多歐梅他時倡和同文館
當持此卷爲詩材

容城陰孝婦詩

容城城似斗有廟祀椒山不謂英靈氣還鍾閭閻間天
憐貞孝志人轉死生關見說衣干結今猶沁血斑

莫以殘遺體翻嫌孝太愚再三原自審萬一冀重蘇白

髮終娛舅黃泉可對夫此身都不惜寧問得旌無割股

例不專旌而法亦不禁聽人之自爲而已然明知不得旌而毅然自行其所見此真爲親計非爲名計者矣

吳子屨提手搨夾漈草堂硯銘字歸閩爲題四十

字硯本南昌農家穿井所得先師裘文達公以稻

三斛易之後余續修通志公因付焉

博物推漁仲當年實寡雙空堂傳夾漈遺硯落西江好

古逢閩士搨銘歸海邦如同鄉祭酒相對坐吟窗

題古幣硯二首

琢硯形如幣分明寓意存治生爲最急應記許衡言

客曰斯言誤余知匠者心正如古彝鼎饗饗鑄精金

爲劉青垣侍郎題硯

歙州采盡舊雲根斧鑿如今到婺源三十年來纔識得
斑斑都作淡金痕

題青花硯

紫雲割盡無奇石次品纔珍蕉葉白如今又復推青花
摩挲指點爭相誇一蟹不能如一蟹可憐浪擲黃金買
請君試此新硯輒揮豪亦自如雲煙

蜨翅硯二首

蝶翎巧仿滕王迹山靈幻化非雕刻良工剖作墨池雙

猶似穿花張兩腋翩翩爾勿矜風流輕薄久已嫌魏收
惟應伴我弄柔翰栩栩然自適如莊周

羅浮蛺蝶翅盈尺五色天衣雲錦織偶然仙蛻落空山
風雨多年今化石誰歟琢硯吾得之惜無好句題烏絲
何當喚起謝無逸倩寫柳絮梨花詞

送書紱庭制府再任兩江

一路薰風引碧油東南士女望鳴騶重臨果見黃丞相
快睹如迎郭細侯吳楚封疆尋舊迹揚徐田賦入新籌
綠章定是多封事豈但江山得勝游

以元唐棣長江萬里圖贈紱庭制府併題絕句

萬里銀濤接碧空一江橫亘界西東青山兩岸無窮景
都在春風長育中

壽姜少巖

通儒今馬鄭循吏古黃龔

謂尊甫自

得子承家法聞君

有父風注經參北海

白岩所著毛詩寫入四庫君多參訂於其間

理縣佐巴

東

白岩作令君佐之為政

未識蘇和仲欣逢鄭小同

君之子以書應試入都

倉傳學派筆陣見文雄訪舊尋吾黨祈詩壽乃翁稱觥

深所願著句愧難工聊附南飛鶴迢迢寄越中

題雪溪墨竹

襍綖一丈青鸞尾何人縮入尺幅中可憐隨手暈淡墨

尚令撲面生清風
亭亭自倚瘦石立
落落一掃凡葩空
嵇康阮籍都不畫
入林肯著王安豐

紀文達公遺集卷第十